

Акафист Пресвятой Богородице в честь Ея иконы «Утоли моя печали»

Празднование 25 января / 7 февраля

Кондак 1

Взбранное нам и дивное избавление даровася, Твой образ честный, Препоблагословенная Дево Владычице Богородице, яко избавльшеся от злых явлением его и к нему взирающе, восписуем Ти благодарственная раби Твои, Богородице, но яко имущая державу непобедимую, от всяких нас бед свободи, да зовем Ти:

Радуйся, Радосте наша, избави нас от всякаго зла и утоли наша печали.

Икос 1

Ангел множество, и вся Небесная воинства славят Тебе, Царицу всех Богородицу, Ты же исполнила еси радости души наша милостивым явлением нам образа Твоего святого, Богоизбранная Дево Владычице. К нему же кланяющеся, Тебе умиленная моления возсылаем, милосердому Твоему к нам заступлению со страхом зовущи таковая:

Радуйся, Ты Отца Безначальнаго благословение; радуйся, Ты Сына Превечнаго жилище. Радуйся, Ты Духа Святаго пребывание; радуйся, яко Тебе славят многоочити Херувими. Радуйся, яко Тебе похвальная приносят шестокрилати Серафими; радуйся, яко Тебе вся Небесная воинства величают. Радуйся, яко Тебе вся колена земная Матерь Божию исповедуют; радуйся, яко Тобою вся вселенная веселия исполняется. Радуйся, яко Тобою вся болезни наша исцеляются; радуйся, Твоими бо молитвами печали наша утоляются. Радуйся, Твоими бо ходатайствы вся прошения наша исполняются; радуйся, яко Тебе и Сыну Твоему в Твоей честней иконе благодарно поклоняемся.

Радуйся, Радосте наша, избави нас от всякаго зла и утоли наша печали.

Кондак 2

Видят Тя, Богоизбранная Отроковице, вся Небесныя силы предстоящу всегда Престолу Славы Небеснаго Царя и за христианы к Сыну и Богу молящуюся, Небесная Царице; мы же, грешнии, на земли зряще Твою святую икону и к ней припадающе, Тебе радостно поклоняемся, зовуще: Аллилуия.

Икос 2

Разум подаждь нам, Всеусердная Предстательнице наша, Небесная Царице, из уст бо нас скверных, како мощно пети Твоему имени? Яко

благих еси нам Ходатаица, сильна еси вспомоществовати во всякой нами требуемой помощи, да Тебе со умилением зовем сице:

Радуйся, молитвы о нас к Сыну и Богу во утешение приносящая; радуйся, Твоими молитвами очи наша от вечного рыдания избавляющая. Радуйся, Твоими матерними молитвами Сына и Бога на милость к нам приклоняющая; радуйся, Твоими молитвами праведный на нас гнев Божий утоляющая. Радуйся, Твоими ходатайствы грехи наша прощающая; радуйся, Твоею помощью страсти наша истребляющая. Радуйся, Твоим предстательством временная наша скорби разрушающая; радуйся, Ты во всяких бедах и нуждах нам помогающая. Радуйся, Ты славящих всегда прославляющая; радуйся, Твоею радостью печали наша утоляющая. Радуйся, непрестанное нам веселие подавающая; радуйся, Ты нам райския двери отверзающая.

Радуйся, Радосте наша, избави нас от всякаго зла и утоли наша печали.

Кондак 3

Сила Вышняго осени Тя к скорому и теплomu заступлению верно притекающих к Тебе и честному Твоему образу поклоняющихся, единой бо токмо Тебе, Нетленной и Пречистой Богоматери, дадеся дар всякое благое наше прошение исполняти, и едина Ты можеш нам помощи, елико хочеш. Тем всяк возраст славословит Сына Твоего и Бога нашего, зовый: Аллилуия.

Икос 3

Имущи богатство милосердия неоскудное, всем концем земным простираеш руку помощи и подаеш болящим исцеление, страждущим ослабу, слепым прозрение и всем вся по своей их потребе исполняеш. Мы же Тебе благодарно сице поем:

Радуйся, едина Мати, милосердие нам являющая; радуйся, милости сокровище многоценное нам открывающая. Радуйся, безчисленныя щедроты всем подавающая; радуйся, слово премудрости просящим дарующая. Радуйся, преспеяние разума юным подавающая; радуйся, раны наша греховныя истребляющая. Радуйся, праведных в райских селениих насаждающая; радуйся, отчаянным будущих благ Надеждо и Укрепление. Радуйся, всех падших скоро к благодати возставляющая; радуйся, всем во всякой требуемой от Тебе помощи помогающая.

Радуйся, Радосте наша, избави нас от всякаго зла и утоли наша печали.

Кондак 4

Бурею многих бед одержимым нам всегда помогаеш, Небесная Царице, с верою прибегающим к Тебе и поклоняющимся цельбоносней Твоей иконе, ейже первописанней иногда рекла еси: «С сим образом

благодать Моя и сила». И мы истинно веруем, яко послушаеши прошения призывающих имя святое Твое и Сыну Твоему зовущих: Аллилуия.

Икос 4

Слыша Господь Твоя на Небеси о нас ходатайства, Избранная Палато Духа Святаго, исполняет Твоя прошения, мы же грешнии на земли, видевше святую Твою икону, яко светозарное солнце нам светящуюся, Тебе яко Божией Матери дерзаем глаголати:

Радуйся, Солнце Мысленное нам являющая; радуйся, светом немерцающим нас просвещающая. Радуйся, умерщвленных нас грехами оживляющая; радуйся, неплодным матерем ложесна разрешающая. Радуйся, нечаянно находящих на нас злых врагов скоро прогоняющая; радуйся, желаемых благ всегда нас наслаждающая. Радуйся, скоро в бедах и в печалех нас утешающая; радуйся, верою имя Твое призывающих от нечаянныя смерти спасающая. Радуйся, на Тя уповающим безконечный живот дарующая; радуйся, веру и любовь к Тебе имущих к Небеси возводящая. Радуйся, Предстательство наше крепкое; радуйся, во всяких обстоятельствах нас защищающая.

Радуйся, Радосте наша, избави нас от всякаго зла и утоли наша печали.

Кондак 5

Боготечную звезду, честную Твою икону Ты нам показала еси, Владычице мира, к нейже мы зряще и верою сердечною молящися, Тебе, Богородице, глаголем: «Ты еси нам щит непобедимый и стена неборимая, вопиющим Ти: Аллилуия».

Икос 5

Видеша Силы небесныя на руку Твоею Создавшаго Своима рукама человеки и Владыку разумевающе Его; мы же грешнии на земли зряще изображенную Тебе Пречистую Матерь Его, любезно Свои руке к нам простирающую, к Тебе умильно зовем:

Радуйся, на руку Твоею Огнь Божественный неопально держащая, Имже грехи наша попаляются; радуйся, на руку Твоею Света Неприкосновеннаго носившая, Имже души наша просвещаются. Радуйся, врагов наших видимых и невидимых побеждающая; радуйся, любовь и милосердие к нам являющая. Радуйся, руке Твои в поручение о нас к Богу приносящая; радуйся, вход в Царствие Небесное нам отверзающая. Радуйся, Твоею помощью нас защищающая; радуйся, Твоим ходатайством грехи наша прощающая. Радуйся, Твоим молением печали наша утешающая; радуйся, яко Твоим предстательством всяких благ наслаждаемся. Радуйся, яко Тобою вся во благих желания наша исполняются.

Радуйся, Радосте наша, избави нас от всякаго зла и утоли наша печали.

Кондак 6

Проповедницы Богоноснии апостоли, по Вознесении Господни, при освящении храма Твоего невидимою рукою изображенный шаровными подобии на стене обретше образ Твой, Владычице, рожденному от Тебе Богу воспеша: Аллилуия.

Икос 6

Возсияла еси премудростию от Истинного Солнца правды, Богоизбранная Отроковице, и, лучи истинного Богоразумия испущающи, теми освещаеши всех верою исповедающих Тя истинную Матерь Божию быти, вопиющих сице:

Радуйся, всех на Небеси славою Твоею просвещающая; радуйся, начало человеческого спасения устрояющая. Радуйся, ковчеже жизни наша, от потопа смертнаго нас сохраняющий; радуйся, в райских селениях жити нам дарующая. Радуйся, Предстательница наша к Богу, мир спасающая; радуйся, в бедах сущих скоро заступающая. Радуйся, всякия болезни человеческия, телесныя и душевныя, исцеляющая; радуйся, немым и косноязычным словеса отверзающая. Радуйся, всякаго блага просящим у Тебе Подательнице; радуйся, учение благодати всем источающая. Радуйся, тем всякий чин и возраст довольно услаждающая; радуйся, всех благия желания исполняющая.

Радуйся, Радосте наша, избави нас от всякаго зла и утоли наша печали.

Кондак 7

Хотя долготерпеливый Всевидец Господь явити Своего человеколюбия и щедрот бездну, избра Тебе Себе в Матерь, милости неисчерпаемый Источниче, да аще кто праведным судом Божиим осуждения достоин. Твоим всемогущим ходатайством сохранен будет и Сыну Твоему и Богу нашему велегласно зовет: Аллилуия.

Икос 7

Дивна показал еси дела Твоя в Пречистой Матери Твоей, Господи, и дивну даровал еси нам Ея икону, паче лучей солнечных просвещающую людей, яко самую зрящих Богородицу, и верою сердечною от души любовью вопиющих таковая:

Радуйся, икону Твою на земли яко облак всем распростирающая; радуйся, тою паче надеяния милосердное к нам заступление являющая. Радуйся, Твоею иконою источники чудес всюду источающая; радуйся, явлением Твоея иконы вся люди просвещающая. Радуйся, тою новое знамение благодати в Церкви являющая; радуйся, яко, на икону Твою

взирающе, Самой Тебе, истинной Богородице, поклоняемся. Радуйся, иконою Твоею, яко столпом огненным, мрак греха отгоняющая; радуйся, тою печали наша утоляющая. Радуйся, Церковь освятившая тоя явлением; радуйся, яко мы грешнии сохраняемся Твоим заступлением. Радуйся, вретище скорби наша растерзающая; радуйся, вечною радостью нас одевающая.

Радуйся, Радосте наша, избави нас от всякаго зла и утоли наша печали.

Кондак 8

Странну и преславну в Церкви явльшуюся, святую Твою икону Ангели воспеша, апостоли прославиша, лик святителей поклонишася, мы же грешнии, припадающе, ожидаем Твоя великия и богатыя милости, с веселием вопиюще: Аллилуия.

Икос 8

Всеми вышними и нижними владычествуяй Господь, видев Тя Матерь Свою всегда предстоящу Ему и со умилением Ему приносящу моление о нас грешных, обеща исполнии вся прошения Твоя. Мы же грешнии, надеющиеся на Твоя Матерняя о нас молитвы, благодарственная Тебе приносим сице:

Радуйся, с Сыном Твоим и Богом вечно царствующая; радуйся, Емуже всегда о нас моления приносящая. Радуйся, всех к Тебе прибегающих, Твоею милостию покрывающая; радуйся, всех Радосте, печали наша утоляющая. Радуйся, примирение наше с Богом соделавшая; радуйся, Бога и человека соединившая. Радуйся, спасение человеческое устроившая; радуйся, прародительнаго греха клятву разрушившая. Радуйся, смертное наше естество безсмертием просветившая; радуйся, жестокость сердца нашего умилившая. Радуйся, отчаянных к Богу возводящая; радуйся, сосуды смертная, на нас уготованная, сокрушившая.

Радуйся, Радосте наша, избави нас от всякаго зла и утоли наша печали.

Кондак 9

Все естество ангельское похвальныя песни приносит Тебе, Божией Матери и Заступнице всех припадающих Тебе и просящих Твоя помощи, яко твердым и крепким Твоим предстательством праведных веселиши, грешных заступаеши и от бед избавляеши, и печали утоляеши, и молишися о всех верою зовущих: Аллилуия.

Икос 9

Ветия многовещанная, яко рыбы безгласнии, недоумеют хвалити славный, Владычице, иконы Твоя праздник, ниже от скверных устен

наших приносимыя Ти похвалы достойны, обаче, неисчетная благодеяния, иконою Твоею нам являемая, видевши, душою и сердцем радуящаяся, Тебе глаголем:

Радуйся, от глада нас Хлебом Жизни питающая; радуйся, от губительства смертного безсмертием нас соблюдающая. Радуйся, от труса греховного нас сохраняющая; радуйся, от потопа смертного рукою Твоею крепкою нас избавляющая. Радуйся, от огня росую молитв Твоих нас восхищающая; радуйся, от бед сильным Твоим предстательством нас защищающая. Радуйся, от меча силою Твоею нас охраняющая; радуйся, от нашествия иноплеменник нас спасающая. Радуйся, от междоусобных брани истинным миром нас ограждающая; радуйся, от смертоносных ран прибегавших к Тебе исцеляющая. Радуйся, от належащего праведного прещения Божия Твоим молением нас свободяющая; радуйся, от всякия нас язвы Твоим честным ходатайством изымающая.

Радуйся, Радосте наша, избави нас от всякаго зла и утоли наша печали.

Кондак 10

Спасти хотя род человеческий от прелести вражия, Человеколюбец Господь Тебе Матерь Свою дарова земным на помощь, глаголя: «Сынове человечести, се Мати Моя Покров и Прибежище вам да будет, печальным Утешение, скорбящим Радование, обидимым Заступница, да всех из глубины греховных воздвигнет, вопиющих: Аллилуия.»

Икос 10

«Царю Небесный, — тако молит за ны всегда Небесная Царица, — приими всякаго человека, славящаго Тя и призывающаго Имя Твое, идеже бывает память святому имени Твоему, и прославляющих Мя имене Твоего ради, и не отрини их от лица Твоего, но благоволи в них и приими от них всякое моление, и всех от бед избави». Мы же грешнии, надеющиеся на Твоя матерняя молитвы, зовем сице:

Радуйся, яко Ты Молитвенница наша к Богу теплая; радуйся, яко Твоя матерняя молитва много может, Владыку умилоствляющая. Радуйся, отчаянных Надеждо, печали их утоляющая; радуйся, Твоею благодатию наше недостойнство осиявающая. Радуйся, нашу скверну Твоею чистотою очищающая; радуйся, моления наша Твоим благоуханием исправляющая. Радуйся, брение наше тленное в нетление обращающая; радуйся, неможение наше врачующая. Радуйся, вся наша болезни душевныя и телесныя исцеляющая; радуйся, нашедший на нас облак страстей, скорбей и печалей скоро разгоняющая. Радуйся, сильным Твоим прощением вся полезная

дарующая.

Радуйся, Радосте наша, избави нас от всякого зла и утоли наша печали.

Кондак 11

Пение всеумиленное прими от нас, Небесная Царице, и молитву, приносимую Тебе, Дево Богородице, услыши: к Тебе бо в напастех, скорбех и печалех прибегаем и пред Тобою в бедах наших слезы проливаем, и молим: «Утоли наша печали, и прими сию жертву Твоих рабов, зовущих: Аллилуия».

Икос 11

Светопримная свеча истинного Света сущих на земли явльшися, души просвещаеши чтущих Твоя иконы явление и к разуму Божественному наставляеши поющих Ти сиевая:

Радуйся, свече неугасимая Огня невестественного, нас просвещающая; радуйся, заре незаходимаго Света Божественного, нас озаряющая. Радуйся, Солнце правды, нас облистующее; радуйся, Источник жизни райския нам источающая. Радуйся, Мати Света Истинного, благочестивых души просвещающая; радуйся, Мати всех Бога, озлобленных всех души утешающая. Радуйся, Тя на помощь призывающих и имя Твое славящих спасающая; радуйся, уповающим на Тя живота непостыдный конец дарующая. Радуйся, всем родом, Тя Матерь Божию почитающим и Богородицу именующим, непрестанно помогающая; радуйся, осенением святых Твоя иконы злых духов мечтания от нас прогоняющая. Радуйся, во внезапных на нас находящихся скорбех и печалех скоро нас утешающая; радуйся, всему миру радость дарующая.

Радуйся, Радосте наша, избави нас от всякого зла и утоли наша печали.

Кондак 12

Благодать Божественную испроси нам у Небеснаго Владыки Сына Твоего и Бога и прости нам руку помощи, и молитвами Твоими утоли наша печали, покрый нас кровом крилу Твоею, отжени от нас всякого врага и супостата, умири нашу жизнь, да не погибнем люте, но прими нас в вечныя кровы, Покровительнице наша, да радуящися Тебе зовем: Аллилуия.

Икос 12

Поюще Тя, державную Помощницу, хвалим Тя и, молящися Тебе со умилением, веруем и исповедуем, яко испросиши благая временная и вечная воспевающим Ти:

Радуйся, молитвами Твоими весь мир спасающая; радуйся, всю

вселенную ходатайством Твоим заступающая. Радуйся, православным на варвары победы подавающая; радуйся, нашествия на христианы иноплеменных побеждающая. Радуйся, в вере благочестивыя сохраняющая; радуйся, непочитающих иконы Твоя Святыя яко прах от лица земли развевающая. Радуйся, поклоняющимся иконе Твоей и Тя на помощь призывающим, и в печалех бедствующим скоро помогающая; радуйся, нас грешных ко спасению и восприятию благ вечных наставляющая. Радуйся, безконечнаго Царствия у Сына Твоего и Бога нашего всем нам испрошающая; радуйся, верным безконечную жизнь дарующая. Радуйся, всем во всякой потребе вся полезная и благая подавающая.

Радуйся, Радосте наша, избави нас от всякаго зла и утоли наша печали.

Кондак 13

О Всепетая Мати, Небесная Царице и Владычице, Дево Богородице, рождшая всех святых Святейшее Слово, нынешнее приемши приношение, утоли наша печали и избави нас от всяких напастей, бед, скорбей и вечнаго осуждения и грядущаго изми мучения, и сподоби нас рабов Твоих в вечных райских селениях водворитися, зовущих: Аллилуия.

(Этот кондак читается трижды, затем икос 1 и кондак 1)

Молитва святого Ефрема Сирина

Дева, Владычице, Богородице, паче естества и слова рождшая Единородное Божие Слово, Творца и Владыку всей видимой и невидимой твари, Единого от Троицы Бога, Бога и Человека, соделавшаяся обителю Божества, вместилищем всякой святыни и благодати, в немже, по благоволению Бога и Отца, содействием Святаго Духа, телесно обиташе полнота Божества, несравненно превознесенная боголепным достоинством и преобладающая пред всякою тварию, Слава и Утешение, и неизреченное веселие Ангелов, царственный венче апостолов и пророков, преестественное и чудное мужество мучеников, Поборнице в подвигах и Подательнице победы, уготовляющая подвижником венцы и воздаяния вечныя и боголепныя, превысшая всякой чести, честь и слава преподобных, непогрешительная Путьуказательнице и Наставнице безмолвия, двери откровений и духовных таин, Источник Света, врата вечной жизни, неистощима река милосердия, неисчерпаемое море всех боголепных дарований и чудес, Тебе просим и Тебе умоляем, сострадательнейшую Матерь человеколюбивого Владыки, буди милостива к нам, смиренным

и недостойным рабам Твоим, воззри благосердно на пленение и смирение наше, уврачуй сокрушения душ и телес наших, рассеяй видимых и невидимых врагов, буди для нас, недостойных, пред лицом врагов наших крепким столпом, бранным оружием, сильным ополчением, Воеводою и непреоборимую Поборницею, покажи ныне на нас древняя и чудная милости Твоя, да познают беззаконнии враги наши, что Сын Твой и Бог един есть Царь и Владыка, яко Ты еси воистину Богородица, рождающая по плоти истинного Бога, яко вся Тебе возможно, и чего ни восхощеши, Владычице, имаши силу все сие совершити на небеси и на земли, и на всякое прошение даровати что кому полезно: больным здравие, сущим на мори тишину и доброе кораблеплавание.

Путешествующим спутешествуй и охраняй их, пленных спасай от горького рабства, утешай печальных, облегчай нищету и всякое другое телесное злострадание: всех свободяй от душевных недугов и страстей, невидимыми Твоими предстательствами и вразумлениями, дабы, добре и непреткновенно совершивше путь сей временной жизни, улучили мы чрез Тебя и оные вечныя блага в Царстве Небесном.

Верных, почтенных страшным именем Единороднаго Сына Твоего, уповающих на Твое предстательство и на милость Твою и во всем имеющих Тебя своею Ходатаицею и Поборницею, укрепляй невидимо противу окружающих врагов, разсей облак уныния, облегающий души их, избави их от душевнаго утруждения и подай им светлое благодушие и радость, возставивши мир и безмятежие в сердцах их.

Спаси молитвами Твоими, Владычице, сию Тебе преимущественно посвященную паству, весь город и страну, от глада, труса, потопа, огня, меча, нашествия иноплеменник, междоусобных брани, отврати всякий гнев праведно на ны движимый, благоволением и благостию Единороднаго Сына и Бога Твоего, Емуже подобает всякая слава, честь и поклонение, со Безначальным Его Отцем, с Совечным и Животворящим Его Духом, ныне и присно, и во веки веков! Аминь.